



наведи телефон

Лүимә сәрипос

24.06.2021
№ 12 (1246)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru

Лүпта Этпос 20 хөталэт пүльницатт рүпитан лёккарыт янытласанув

Ты
номерт
ловиньтэн:



Л. Теткина вәрум хури

Школа аслам
няврамыт мәгыс
ляххал

▶ 3

Сосса мәхум
наманыл акв
нэпакн хансавет

▶ 5

Пәвылт рүпитан
пүльница

▶ 8-9

Вөрүй совныл
имтат вәри

▶ 10

Мән мәвн кетым
мәхум яныг
сав тотсыт

▶ 14-15

Экваг-ойкаг 50
тәл аквьёт өлэг

▶ 16

Наталья Никоновна Абрамова Хулюмсунт пәвылт пүльницат 35 тәл мәхум пусмалтым рүпиты. Ты пәвылт өлнэ пүльницат рүпитан хөтпат урыл 8-9 лөпсыгт яныг потыр ловиньтэн.

Пёриян тэлан щёпитактэв

Ты тал таквсы порат нэпак таратан вәрмалы вәраве. Пёрияп миннэ сыс наблюдателиг өлнэ хөтпат тот сунсуңкве патэгыт, та колт матыр ошмар манос ләпалахтын вәрмалы ул вос ёмты, тән аны ты тэла ёмщакв уральтаңкве ханищтавёсыт.

Мөллал ляххал тотнэ колн округ Общественный палата кўшай вәңын нэ **Ольга Сидорова**, Сургутский районт Общественный палата кўшай вәңын хум **Сергей Таньшин** ос Советский районт Общественный палатат рўпитан нэ **Снежана Позднякова** ёхталасыт. Тән нэпак таратан тэла урыл потыртасыт.

Округувт пёрияп суснэ

мәгыс мәхум кит этпос Общественный палата хосыт ханищтавёсыт. Ты эрнэ тэла миннэ порат усанувт ос пәвланувт акв сөтыра нёлловсәт нупыл атпанкем сәвит элум-хөлас наблюдателиг рўпитаңкве патэгыт.

Сәвыңпәлэ няврамыт ханищтан ос мир пусмалтан мәтт рўпитан мәхум, тувыл студентыт ос общественный рўпата вәрнэ хөтпат пёрияп

колт нэпак таратан тэла уральтаңкве тах патэгыт.

Кәтпос пиннэ торыг матыр ошмарлан вәрмалы ёмты ке, тән тәра кәсалыяныл ос полиция хөтпатн ләвёгыт. Ты ханищтап тыимәгыс щёпитавес, пёриян вәрмалы мўсхалыг вос олы.

Тувыл аны ты накт хаштал әгм мә янытыл мины. Мәхум ты әгмыл ул вос хәххатасыт, кәтпос пиннэ мәхум әвисунтыт уральтаңкве патавет, тән нёланыл ос сўпасаныл маска-төрыл лап-пантым вос ошсаныл. Атиңк пёрияп колн таратаңкве ат патавет.

Аны пёрияп мус иң

хүрум этпос хультыс. Тыимәгыс вөртур этпост наблюдателиг ханищтан тэла ос акв щёс вәрыг-лаве, нэпак таратан вәрмалы мәк эрнэ щирыл вос мины, нэматыр тәрвит ул вос ёмты.

Та хөталт кәсың партианыл ос янас пёрияхтын депутатыт пәлыл хөтпат тот акваг сунсыглахтым өлуңкве патэгыт.

Пёрияп хөталт сәв мөт-мөт хөтпат рўпитаңкве патэгыт. Матыр тәрвит вәрмалы ёмты ке, юрист хөтпа ос мөт специалистыт тәра нётмил вәруңкве тув ёхтуңкве вос вёрмысыт.

Николай МЕРОВ

Округ мирколныл нётавет

Туяг округ мирколт яныг сапрәни өлыс, тув ханты ос мәнъщи хөтпат вөвыглавёсыт. Төнт тән потыртасыт, мәнъ пәвлың мәтт ос вөрың мәтт өлнэ соссә хөтпат вәгыт ман әти, манырсыр нётмил мирколныл вөвуңкв рөви.

Насати, сәвсыр тэлат вәрнэ мәгыс олтотвиңкв ос рөви, туп ты вәрмалы мәгыс проект-нэпак хансуңкв эри. Тувыл акв тамле нэпак хансум мәхум халт касыл вәраве.

Мирколт рўпитан хөтпат нэпакн хансым сәвсыр тэлат тән ёмашакв ловиньтыяныл ос ләвёгыт – тән халанылт хотьютаныл шар ёмас проект-тэла номылматас, та хөтпа олныл та миве. Ты щирыл мирн олн-нётмил минэ рўпата руц ләтңыл тох ләваве – «грантовая поддержка», олныт ос «субсидияг» ләвавет.

Аны ты йист матыр ёмас рўпата вәруңкве кәсащан мәхум сәв кос өлы, таимәгыс тән сәвсыр щирыл нётуңкв патвёсыт. Ос ты нётмил винэ мәгыс, тәнанылн өвлэт эрнэ нэпакыт ёмашакв хансуңкв эри.

Аны мәнъщи ос ханты хөтпат пёс өлупсаныл, пёс вәрмалыныл элалы тотнэныл мәгыс тамле тэлат щирыл мирколт субсидия-олн виңкв вөрмёгыт:

► *пёс мөйтыт, потрыт атнэ, пёс накыт ос пёс вәрмалит тәра-паттын*

мәгыс ос матыр пёс щирыл мәштырлан мәгыс олн вөвуңкв рөви;

► *пёс йис өлупса элалы тотнэ мәхумн, сәлы ёвтнэ ос өщнэ хөтпатн, хул пувнэ рўпата мәгыс субсидия-олн виңкв рөви;*

► *пил, ләхыс атнэ ос сәвсыр мөт тэнутыг вәрнэ мәгыс;*

► *мәнъщи манос ханты ләтңыл газетат ос журналыт таратан мәгыс нётмил ос миве;*

► *мөт сәвсыр газетат, журналыт таратан мәгыс ос янас субсидия-олн миве, ос тот ты вәрмалы уральтаве - тән ты тәстым олнытыл вус вәравет, округ мирколныл арыг олныл ул вос нётавет;*

► *туризм тэлат элалы тотнэ мәгыс.*

Тәнти олн сәлнэ организациятн, тән «некоммерческий» ләвавет, янас щирыл олн миве. Мирколныл маим олнытыл тот рўпитан хөтпат няврамытн ос мәнълат хөтпатн вос нётэгыт, сәвсыр ханищтан тэлат элалы вос тотыяныл.

Общинат ос общественный организацият мөт нётмилыл мивет, руц ләтңыл тох намаим өлы - «Грант губернатора ХМАО-Югры на развитие гражданского общества».

Ты олн-нётмил кос хотьют виңкв вөрми – община өщнэ хөтпа, тәнки янас щирыл рўпитан предприниматель-мәхум ос сәвсыр организацият.

Мирколныл тётым ляххал мәнъщи ләтңыл **Валентина ХОЗУМОВА** хансысгэ



Н.А. Евлахов



Е.Д. Айпин, Р.М. Проводников ос А.В. Филипенко

Вөрт өлнэ мэхум урыл потыртасыт

Ты этпос 11 хөталэт округ мирколт сапрәни өлыс. Ты сапрәни Ассамблеят рүпитан хөтпат тән вәрыгласаныл, Еремей Айпин тот пунктотыс. Тән ань ты вәрмалит урыл потыртасыт.

Мәньщи хөтпав мирн нёты

Мән округувт тәнти янас рүпитан предприниматель-хөтпат хумус рүпитэгыт, тәрвитың вәрмаляныл урыл **Николай Андреевич Евлахов** потыртас. Тав юи-өвыл тәлытт күщаиг тот өлы, рүпататэ тох ләваве - Уполномоченный по правам предпринимателей.

Ань тав атхатыглам мэхум элы-пәлт такви вәрнэ рүпататэ урыл потыртас. Коронавирус агм өлнэтэ мәгыс мән округувт сака сәв хөтпа вуньшалыг патсыт, тәнти рүпатаныл өл-пөилттасаныл ос элалы рүпитаңкв ат вөрмөгыт.

Еремей Айпин таве титыгластэ, сossa мэхум халт сәв хөтпат рүпата тәл хультсыт? Николай Евлахов ювле ләвыс,

хотьют тәрвитың вәрмалын ярми, тав тәнаньныл акваг нёты. Тәл сыс сәв хөтпа нётмил вөвнэ мәгыс тав палтэ ёхталы. Төванакт ос тав такви хөт-әти свонитәлы, пүмщалахты – мэхманэ хумус рүпитэгыт, оln сәлэгыт ман әти.

Мөлты тәл предприниматель-хөтпат пуссын олныл нас нётвёсыт. Тән олныл вос мивет, ты урыл хүлтнэ ләтың Президент Владимир Путин хансыс.

Николай Андреевич потыртас, кәсың хөтпа олныл вос ойтаве, тав такви банкытт рүпитан мэхумн свонитәлыс ос ты нётмил винэ мәгыс тән ётаньл потыртас.

Вөрт өлнэ мэхум урыл

Мән округувт сәв хөтпа пёс өлупсаныл щирьл вөрт өлэгыт. Тәнаньныл нётнэ мәгыс янас сәккон

пирмайтым өлы. Та ювле хультум 2020 тәл сыс округ мирколныл тән хумус нётвёсыт, ты өвыл-тыт янас потыр өлыс.

Күщаит ань ләвсыт – ювле хультум тәл сыс тән 58 млн солкөви общинатт рүпитан мэхумн мисыт. Сәвыңпәлэ олныт районуытн тётвёсыт, тот общинат халт ләкквартвёсыт.

Хүрум хөтпа тәнти өлнэ мәнанылт колыт, ампарыт ос пәртколыт үнттысыт, тув 3 млн солкөви майвес. Тувыл тәл сыс сәвсыр тәлат вәрыг-лавёсыт – касылыт, тына-лахтын мät щёпитәлвёсыт, тот община хөтпат тәнти тәнутаныл, порма-саныл тыналасаныл. Тув өс сәв олн минас.

Ос та тәл сыс йильпи проект-тәла вәрнэ мэхумн 21 млн солкөви тәстувес. Ты олныт акван-ловинь-таңкв те, 58 млн солкөви сәвитыг та ёмты.

Мәньлат пыгыт өвылтыт

Ань ты сапрәнит вөраян мәньлат хөтпат писаль өщнэныл урыл

өс потыртасыт. Матах тәл ювле хультум порат округувт сәккон хасвес – пыгыт 16 тәланыл төвлын юи-пәлт пуссын писаль өньщүңкв вөрмө-гыт, тыи мәгыс тән пус-сын разрешение-нәпа-кыл майлувёсыт.

Ос Россия сәкконэ щирьл, 18 тәланыл төвлын юи-пәлт пыгыт писаль өньщүңкв тәрт-вёсыт.

Ос ты йист мөт-мөт үсытт манос пәвлытт сәв мәньлат хөтпат яныг өвыл вәруңкв патсыт, писалил сәв хөтпа пистыяныл. Яныг күщаит ты урыл хансым округ сәккон өста мөт щирьл хансуңкв номсэгыт.

Ты сәккон округ дума депутатыытн пирмайтаве те, тот тох хансаве – мән округувт туп вөрт өлнэ сossa пыгыт 16 тәланыл төвлын юи-пәлт писаль өньщүңкв тах тәртавет, тән вөраяңкв вос вөрмы-сыт. Ос эрнэ щирьл хунь хансаве, тәнти та вәганьл.

Валентина ХОЗУМОВА

Школа а́стлам няврамыт ма́гыс ля́ххал

Мән округут 2019 тәлт «региональный перечень профессий» нампа нэпак пирмайтавес. Нэпакн 97 савсыр профессият хансым өлэ́гыт.

Сосса ма́ньлат а́гит ос пыгыт учителяг, лёккарыг, вёр ургалан хөтпаг, уйхул пусмалтан, хул алышлан хөтпаг ос савсыр мөт рүпата вәрнэ хөтпаг хаништахтуңкве ань вёрмёгыт.

Хаништап ос ма́ньлат хөтпат вәрмаланыл щирыл рүпитан департамент колт кўщай хум **Алексей Дренин** лавыс:

– Ты э́лы-пәлт рүпитан сәккон щирыл туп нуса тотнэ щёмьят яныгман а́гит ос пыгыт олныл тәстыглавёсыт. Ань ма́ньлат хөтпат хаништахтын ма́гсыл щәняныл-а́щаныл олн ке ойтэ́гыт ос профессияныл ты нэпакн хансым ке өлы, олнаныл ювле мивет.

Университетт хаништахтан а́гит ос пыгыт акв тәл сыс 100 сөтыра солкөвияныл ювле мивет. Училищат манос колледжит хаништахтын няврамыт 50 сөтыра солкөвияныл ювле выгыт.

9 класс а́стлам няврамыт 22 специальность ос 11 класс а́стлам а́гитпыгыт 55 профессият щирыл э́лалы хаништахтуңкве ань вёрмёгыт. «Региональный перечень профессий» нампа нэпак ищхйпың утыт департамент лөпсыт ловиньтаңкве рөви.

Аквта департаментыт сосса ма́хум отделт кўщайг **Надежда Борисовна Костылева** рүпиты. Тав округ янытыл ялантәлы, сосса няврамыт ос щәняныл-а́щаныл ёт хөнтхатыгләлы ос ты нэпак урыл тәнанылн потырты. Ханты нэ́ лавыс:

– *Яңк нә́тнэ э́тпос ам Сургутский район Лямино пәвылн ялсум. Та школат хаништахтан а́гитн-пыгытн ос тән оманылн-а́тянылн ты нэпак урыл потыртасум. Хоты профессиян тән ань хаништахтуңкве вёрмёгыт, манхурип нэ́пакыт ос хоты порат департаментын кәтуңкве э́ри, манасәвит олныл ювле ойтүңкве вёрмавет. Тувыл ма́хум ты ёмас вәрмалит аты пүмшалахтасыт, аты китыглахтасыт.*

Ты тәл сыс ты вәрмалы ма́гсыл округ бюджетныл 43 млн арыгкем солкөвитах тәставе. 2021 тәл ат э́тпос сыс 283 ма́ньлат хөтпат заявление-нэ́пак олн ювле винэ ма́гсыл хассыт, тән халанылт 75 «региональный перечень профессий» нампа нэ́пак щирыл олныл ювле ойтвёсыт.

Юи-өвыл тәлт школа а́стлам няврамыт халт сәв а́гит ос пыгыт ма́нь лёккарыг, няврам хаништан хөтпаг ос



Н.Б. Костылева

юрисстыг хаништахтэ́гыт. Нэ́паканыл тән почта ос МФЦ кол щирыл тув кётыяныл.

Надежда Борисовна лавыс, сәккон щирыл ма́ньлат хөтпатн хаништахтын ма́ныл тән палтаныл рётың юсвой э́тпост манос ма́ньполь э́тпост справка кәтуңкве э́ри.

Ань ма́н округут «Цифровая трансформация» нампа нэ́пак хансаве, тав хунь пирмайтаве, ма́ньлат а́гит ос пыгыт нэ́паканыл ищхйпың утыт «Госуслуги» лөпс щирыл кәтуңкве тах вёрмёгыт. Төнт МФЦ колн манос почтан ялантаңкве воссыг ат э́ри.

Ма́ньщи, ханты ос ёрн няврамыт целевой набор щирыл Санкт-Петербург усн А.И. Герцен нампа университетн учителяг хаништахтуңкв ань өс вөвавет.

Надежда Костылева

лавыс, ты тәл 12 няврамыт тот хаништахтуңкве кәсәщёгыт. Мөлты тәл ат ма́ньлат хөтпа тув учителяг хаништахтуңкве минасыт.

Ты тәл округут янытыл 656 арыгкем ма́ньщи, ханты ос ёрн няврамыт 9 класс ос 343 а́гит ос пыгыт 11 классыт а́стласыт. Тән пуссын «региональный перечень профессий» нампа нэ́пак хосыт университетт манос колледжит хаништахтуңкве э́лалы вёрмёгыт.

Я́тил ма́ньщи ма́хум, нявраманын э́лалы хаништахтуңкве ке кәсәщёгыт, «Региональный перечень профессий» нампа нэ́пак щирыл хаништап департаментыт ищхйпың ут лөпсыт хөнтэ́лың, ёмәщакв ловиньтэ́лың ос тув свонитэ́н.

Людмила ТЕТКИНА

Ю. Шесталов нампа конференция блыс

Лүпта Этпос 21-23 хөталытт «II Шесталовские чтения» нампа конференция Ханты-Мансийск үст блыс. Наука, ханищтап, культура ос сав мөт вәрмалит щирыл рүпитан мэхум тыг вөвыглавёсыт.

«Тәгт мэхум» соссa общинат ос «Югра лылыёп» нампа организацият рүпитан хөтпат ты конференция щёпитәл-сыт.

Өвыл хөталәт учёныит,

нэпак хаснэ мэхум Юван Шесталов хансум потрыт, стихыт урыл ос соссa мирыт пёс йис вәрмаян-ыл, щән ләтңаныл элал хумус тотуңкве эри, пуссын та урыл тот потыртасыт.

Эстонияныл, Венгрияныл, Францияныл ос Россия төва мәт өлнэ хөтпат тәнки хансум потраныл ищхыпың ут хосыт ловиньтасаныл. Коронавирус әгм мәгсыл тән тыг ат ёхталасыт.

Мөтыт хөталәт «Литература обских угров: современное состояние и перспективы развития» нампа хөнтхатыглап вәрыглавес. Төнт Светлана Динисламова «Моё тихое счастье» хансум нэпаке ос «II Шесталовские чтения» нампа сборник урыл потыртас.

Тувыл мэхум Юван

Шесталов хансум стиханэ хөнтлуңкве «Төрүм Маа» музейн вөвыглавёсыт. Юи-өвыл хөталәт мәнщи бйка ёл-щёпитым мән тотыглавёсыт.

Ты элы-пәлт акв тамле конференция 2017 тәлт Югорский университетт вәрыглавес. Россия яны-тыл ос мөт хөн мәтт өлнэ мэхум Юван Шесталов хансум нэпаканэ урыл потыртаңкве, учёныит тәнки докладаныл ловиньтаңкве, төнт тув өс ёхталасыт.

Людмила ТЕТКИНА

Сосса мэхум наманыл акв нэпакн хансавет

Россия янытыл өлнэ мощцаг хультум мэхум наманыл ты тәлныл акв нэпакн хансуңкве патвёсыт. Ты яныг рүпата Россия федеральный агентство-колт (ФАДН) рүпитан хөтпат вәрияныл.

Мәнщи, ханты ос ёрн мэхумн тув хасхатуңкве өс эри. Элумхөлас наме тув вос хансавет, такви нэпаканэ ос заявление тув вос кётыянэ.

Мән округувт яныг-поль Этпос 30 хөталныл МФЦ-кол щирыл нэпакыт кётуңкве тув рөви.

Ты кол кұшаиг рүпитан хум **Владимир Михайлов** ләвыс:

– Нэпаканын Москва үст өлнэ федеральный агентство-колн нәнкинән тотуңкве манос почта щирыл кётуңкве вөрмё-гын. Ань МФЦ-колт рүпитан мэхум соссa щёмьят наманыл тув хансуңкве өс нётыяныл. Тув ёхталан

мәгсыл талон виңкве эри. Тот рүпитан хөтпат тәнки заявление-нэпак хансёгыт, элумхөлас туп такви катпосэ пины. Олн ты вәрмал мәгсыл тән ат выгыт.

«Югра лылыёп» общественный организация кұшай нэ **Людмила Алфёрова** ләвыс:

– Мәхманув акваг китыглахтэгыт, маныр мәгсыл тән реестр-нэпакн хансавет? Мән ювле потыртэв, Россият өлнэ мощцаг хультум мирыт тох пуссын ёмащакв ловиньтавет.

Ань паспорт-нэпаканувт национальность ат хансавет. Соссa хөтпа



Л. Алфёрова, В. Михайлов ос А. Новьюхов

мощца хультыс, тән үргалым өньщавет, сәкконы-тыл пирмайтавет ос савсыр щирыл нётавет. Кұшаитн ёмащакв вәңкве эри, манасәвит мощцаг хультум мирыт Россият өлэгыт, таимәгсыл тамле реестр-нэпак ты вәраве.

Лүймә янытыл өлнэ мирыт пуссын тув хунь хансавет, мирколт ос сав мөт мәтт рүпитан кұшаит ты нэпак тәнки тот сунсуңкве патэгыт. Соссa щёмьят нётмил винэ мәгсыл сав нэпакыт акван-атуңкв төнт ат эри.

Людмила Александровна ләвыс, мән округувт 30 сөтыра арыгкөм мәнщи, ханты ос ёрн мэхум өлэгыт. Ты тәл рётың юсвой Этпосныл

мән округувт кит сөтыра 470 элумхөлас нэпаканыл Москва үсн кётсыт, ос 209 хөтпа реестрын туп хасвёсыт. Тымәгсыл кұшай нэ мэхум вөвиянэ, тәнки нэпаканыл МФЦ-кол щирыл вос кётыяныл.

Кұшай нэ тох потыртас: «Нявраманын ханищтахтуңкве элал ке таңхёгыт манос хул алышлан мәгсыл квота-нэпак эрмыгыл ке, кұшаит ты реестр тәра наманын тот хөнтыяныл ос нәнан тах нётэгыт. Ты сака ёмас ос эрнэ тәла. Наманын молях тув вос хансавет, нэпаканын МФЦ-кол щирыл кётэн, тот заявление хансуңкве нётавен».

Людмила ТЕТКИНА

Яныг хөнт ывылтахтаме пәсныл ты туи 80 тәлыг ёмтыс

Лүпта 3тпос 18 хөталэт Ханты-Мансийск үст «Государственный архив Югры» колт рүпитан махум «Война народная» хөнтхатыглап вәрыгласыт.

Тув школат ханищтахтын агирищит-пыгрищит ос ляххал тотнә махум вбвиньтавёсыт, потрыт хунтлысыт – яныг хөнт порат округ махум хөнтлум мирн хумус нётсыт, манхурип рүпата вәрсит, манах олн сэлсыт, акванатсыт, хоталь кётыгласаныл.

1941-1945 тәлыт блум яныг хөнт ывылтахтаме пәсныл ань ты туи лүпта 3тпосэт 22 хөталт 80 тәлыг ёмтыс. Ты кастыл архивт рүпитан нёквет пёс потрыт, эрнә нёпакыт, газетат ос хурит акванатсыт, суссылтап вәрсит. Ань янге-мане тув вос щалтсэгыт, яныг хөнт урыл документыт вос ловиньтэгыт, матыр-ати тәра-паттэгыт.

Архив колт рүпитан нэг **Елена Бушуева** ос **Елена Петухова** акваннётхатым тох потыртасыт:

– Яныг хөнт олме пәсныл хосаг ёмтыс, пилыщмаң тэлат акваг ювле та

хультэгыт. Ос хөнтлам махманув, юн рүпитам мир, наскәсыг порслым элумхбласатёнув ывылтыт манавн ёрувлаңкве ат эри. Ты урыл сәв вос вәгув, нйвраманувн, апырищанувн вос потыртэв.

Яныг хөнт хумус олыс, манхурип пилыщма махманув суссыт, ты урыл ветераныт потыртәлэгыт, тувыл эрнә нёпакыт ловиньтаңкве вёрмёв. Мән архив-колувт сәв документыт, пищмат, газетат олэгыт, ты пормасыт хосыт ань тыхөтал мус сәв вәрмалы тәра-паттэв.

Округ мирув мāv вуянтаңкве та лйблис

Великая Отечественная война ывылтахтаме пәсныл ань 80 тәлыг ты ёмтыс, ты кастыл мән хөнтлам махманув ос та порат Ханты-Мансийский автономный округт рүпитам мир ывылтыт «**Война народная**» урок щёпита-сув.



Лүпта 3тпос 22 хөталэ – мирув кәстын хөтал. Ты хөталт 1941 тәлт хөнт капай та ывылтахтас, фашистрищит олнә мāv нупыл хөнтыл йигмыгтасыт. Төнт СССР мир, сома акв колтәгыл, мāv вуянтаңкве та лйбльсыт.

Округ мир хунь тамле тәрвигың ләтың хунтамласыт, кәсың үсыт ос пāvлыт хөнтхатыглапыт вәрыгласыт (рущ щирыл: митинг). ывыл хөтал округ военкоматн махум 200 заявление-нёпак хассыт, төват телеграммат кётсыт, ань хөнтлын мән вос вивет.

Ханты-Мансийск үст

блум мәнлыт пыг **Алексей Сергеевич Бесперстов** төнт тох ләвыс:

– Хөнт урыл мән лүпта 3тпос 22 хөталт хунтамласув, та хөтал радио хосыт Государственный Комитет Обороны председатель Вячеслав Михайлович Молотов тав тамле пилыщмаң ляххал тотыс. Төнт ам 18 тәлум туп төвлыс, эргын оркестрыт ёнгысум. Мән, акв оркестрыт эргын ос ханищтахтын пыгыт, акв та хөтал пуссын аквьёт заявление-нёпак хассув, хөнтлын армиян вос кётавёв.

Ты нак ывылтахтаме



Е. Петухова ос Е. Бушуева потыртэв



Архив колн ёхталам нйврамыт

порат **Валентина Александровна Скосырева** 12 тәлә төвлыс. Тав номитэ, та бвыл хөталыт Ханты-Мансийск үс махум хөнтлын мән хумус мингаласыт, нэ потыртас:

– *Лермонтова остановаканыл пристань мус хум хөтпат хөт рядың колоннал ёмсыт. Иртыш я тармыл нила нәиңхәп капаит үрхатасыт (төнт май колёсаң нәиңхәпыт яласасыт, руц ширыл пароходы-колесникиләввёсыт). Китыг намагән тамлег олсыг: «Карл Либкнехт» ос «Роза Люксембург». Самарово я вәтат, пристаньт, нәт ос нйврамыт лйөнщ турсуяныл суйтсыт, хөнтын миннэ махманыл нупыл тыстым-лйөнщым суссыт. Төнт атям юи-бвыл щёс та вәслум.*

Округувныл 17 сөтыра арыг хөтпа хөнтлуңкве тотвёсыт, савыңпәлә юв ат ёхтысыт.

«Всё для фронта, всё для Победы!»

Юн хультум мир магыс социалистический касылыт (соревнования) вәрвёсыт. Округ махум «Всё для фронта, всё для Победы!» тәла магыс ущпылнэг сав рупитаңкве патсыт. Ос щар макыг таи олыс, махум мұсхал ширыл вос рупитэгыт, пормасаныл ос тәнунаныл ёмащакв вос вәрияныл. Мори вәрнутаныл арыг-тапавет, ат ловиньтавет.

Я-ты, ань тамле тәрвitysң порат, предприятият ос колхозыт халанылт касуңкве та патсыт. Махум төванакт танти тәтал олсыт, этэ-хөталэ план магыс, Победа магыс та рупитасыт.

Касың этпос үс ос район кұщаит акван-атхатыгласыт, потыртасыт, хоты организация маныр

вәрсыт, мансәвит маснут ман тәнунт щёпитасыт. Щар мак ёмащакв рупитан хөтпат янытлавёсыт, организацият выгыр знамял майлувёсыт.


Вбраян, хул алышлан ос вөр яктын промышленность колыт сака янытлавёсыт. Тот рупитан мир сав щёс нөх-патыгласыт, округ кұщаитн олныл ос магылн тагатан пёсытыл майлувёсыт.

Яныг хөнт акв хөталэ 338 миллион солкөви сәвит ләвылтавес. Советский мирн кәсың хөтал ты сәвит олн сәлуңкве эрыс. 1941 тәлт таквсы **«Народный Фонд Оборонны»** вәрвес, таве тәкмалтан магыс мир ос рупитасыт, танкыт, писалит, нйлыт ос мөт эрнэ пормасыт вәрнэ магыс олн атсыт. Архивт блнэ нәпакытт хансым олы, хоты колыт манах олн сәлсыт, манах пормас фондын кётсыт.

Мощ ётылнуве **«Хлебный фонд Красной армии»** вәрвес. Колхозт рупитан махум тув колас сам майласыт, ты коньпал нёвиль, мисвой, щаквит ос мөт тәнунт тотсыт. СССР мир яныг хөнтын посылат акваг кётыгласыт, кәсың мирколн махум маснут тотсыт, тувыл элалы кётвёсыт. Яныг хөнт щар бвыл хөталэныл ос юи-бвыл хөталэ мус округ мир, янге-мане, сав рупитасыт, махманув нөх вос патэгыт, Победа Хөтал ляпамтасыт.

Сорманыл лялыт пилтәл суссыт

Та пәсныл 80 тәл овумлас, тәрвitysң танкыт ос машинат яласам лёңхыт састумыг ёмтсыт. Ос хөнтлум махманув, тот патум опанув-ащойканув, атянув, каңканув-ащиянув, пыганув-ащиянув вос номиянув, хумус тән



сорманыл лялыт пилтәл суссыт, хумус оманылн юв үрвёсыт.

Советский Союз Маршал, герой намыл майлым хум, Георгий Константинович Жуков война оигпам порат ләвыс:

«*Мән нөх-патсув – ты Советский мир мак сөтэ. Төнт мән ущпылнэг тәксарыг ёмтсув. Родинав вуянтам СССР мир ос та порат тәрвitysң рупатат вәрум махум мән нәмхуньт ат ёрувлянув. Мән хөла фашистрицит ёт пилтәл хөнтлым, нөх та патсув.*»

Школат ханищтахтын ятил нйврамыт, матъемасыг ёхтысын, хөнт урыл потыр хүнтлысын. Ты пилыщмаң тәла ул ёрувләлын, элалы тотәлын, ханищтәлын, тувыл тах ты урыл нйвраманын потыртән. Ань ты йист пёс накыт акваг мөт ширыл хансуңкве таңхавет, хоть-

ютн хумус әртми, тох потыртэгыт.

Тувыл нэг нйврамыт китыгласанән, округныл яныг хөнтын ялум махум наманыл аман вәганыл, хоты мät щар мак яныг хөнт олыс, та маныр. Нйврамыт ювле татем потыртасыт, матыр-әти пуссын вәгыт, мән мävныл хөнтын ялум намыңсуиң хөтпат наманыл ләвсаныл – **В.Я. Башмаков, Ю.Г. Созонов, С.С. Мухин, А.Ф. Конев.**

№ 1 школат ханищтахтын пыгрищ Арсений Андреев **Ю.Г. Созонов** урыл потыртас. Юрий Георгиевич № 1 школаныл войнан минач, 9-ит классыт ханищтахтас. Хунь ювле ёхтыс, такви школатәт нйврамыт ханищтым сав тәл рупитас, тот музей вәрыс. 2004 тәлт школа тав наметыл ләвуңкве патвес.

Светлана
РОМБАНДЕЕВА

Павылт рўпитан пўльница



А.И. Пашпекин

Лўпта этпос 20 хөталэт лёккарыт янытлан хөтал блыс. Ты кастыл ам Хулюмсўнт павыл пўльницат рўпитан хөтпат урыл потыр хансэгум.

Кўцаиг тот **Александр Иванович Пашпекин** блы. Тав 50 тал ювле хультум порат институт асла, та пасныл махум пусмалты. Ам ты ойка пўльница рўпататэ урыл китыгласлум.

– Александр Иванович, Хулюмсўнт павылт яныг пўльница хунь ўнтгувес?

– Павлувт яныг пўльница 2005 талт ўнттуңкве асла. Ты кол ўнттын магсыл округ мирколныл ос «Газпром» намба организация палныл олн тастувес. Аквта талт ам кўцаиг рўпитаңкве тыт паттувёсум. Ты элыпалт ам сав тал Хальўс пўльницат рўпитасум.

Өвлэт пўльницат 15 элумхөласыт пусмалтасанув. Махум тыт тэрпил майлысанўв, уколыл тўщтысанўв, хөтал сыс тыттысанўв.

Юи-өвил талытт Хальўс районт нила пўльница лап-пантвёсыт. Кўцайанув

акваг лавёгыт, мөт щирыл рўпитаңкве ань эри. Махманув уральтахтуңкве ос пусмалтахтуңкве яныг ўсн вос ялантэгыт.

Ман пўльницав ос лап-пантуңкве кусыглавес. Ань элаль рўпитэв кос, тувыл туп хўрум элумхөлас пўльницан пинуңкве вёрмиянув.

– Пўльницат манасөвит хөтпа ань рўпиты?

– Ань 36 хөтпат тыт рўпитэгыт, тән халанылт 5 лёккарыт. Акв нэ улщпуңк пусмалты, мөт лёккар палт нэкетв эхталэгыт, хўрмит лёккар няврамыт уральтыянэ, нилыт лёккар терапевтыг рўпиты, 14 нэт мань лёккарыг рўпитэгыт, ам хирургыг ос пўльница кўцаиг өлэгум.

Пўльницав хунь ўнттувес, тонт савсыр йильпи эрнэ ут өвтвес. Юи-өвил талт хөпсы пөслын утыл ос нэ хөтпат щаканыл суснэ утыл тотвесўв. Ань

павлың махманув мәнки уральтыянўв. Көлпаныл ос мәнки тыт сунсыянув.

Мөт анализыт сат хөтал сыс кит щёс Хальўсн вертолётыл кётыянўв. Тот лёккарыт ёмащакв сунсыяныл, ос элумхөлас агм ке оныщи, тән хансэгыт ос ищхипың ут хосыт манаवन ювле латың кётэгыт.

Павлувт ёмас интернет хунь вэрвес, тонт тыщирыл рўпитаңкве патсўв. Ань лёккарыт ты ут хосыт ватихал савсыр конференцият вэрыглэгыт. Махум хумус пусмалтэгыт, мән ань ты урыл хўнтлуңкве тот ос вёрмёв. Ты вёрмаль «теле-медицинаг» лававе.

– Ханты-Мансийск ўст рўпитан лёккарыт касың тал округ янытыл махум уральтым яласэгыт, Хулюмсўнт павылн эхталэгыт?

манос мәнполь этпост Ханты-Мансийск ўсныл лёккарыт тыг машинал эхталэгыт. Тән рўпитан махум ос яныгхөтпат уральтыяныл.

Павлув сосса мир өлнэ павлыг лававе, тыт 300 арыгкем мәнщит, хантыт өлэгыт, лёккарыт палт ялуңкве ос акваг вөвыглыянўв. Хулюмсўнт Тагт я ватат ўнлы, витэ тыт мән, мир пўсмалтан «Николай Пирогов» намба наиңхәп тыг ат эхталалы.

Элумхөлас матыр агме ке хөнтаве, мән тара таве пусмалтахтуңкве кётылўв. Ты элыпалт яныг пўльницан свонитэв, китыглахтэв, тувыл хөтпа направление-нэпакыл хансылув ос пусмалтахтуңкве, ёмащакв уральтахтуңкве тув ялуңкве лавилўв.

– Хоты ўсн махум пусмалтахтуңкве кётыянын?



Хум лёккар палт эхтыс

– Павлың махманув ватихал уральтавет. Өвлэт лёккарыт Хальўсныл тыг эхталэгыт. Тән школат ханищтахтын няврамыт ос санитарный книжкат вэрнэ хөтпат сунсыяныл. Рётың юсвой этпост

– Хөтпа сыме ке агмың, Сургут ўсн сым пусмалтан пўльницан ялуңкве кётылўв. Элумхөлас ләглэ, кәтэ ке сакватытэ ос Сургут ўст рўпитан травматологический центрын мины. Няврам



Т.И. Алгадьева



Н.Н. Абрамова мән нъяврам сунсытэ

агмыл ке ёмты, Нижневартовск үсн кётылүв. Мәхманув Югорск, Халь-үсн, Нягань ос Ханты-Мансийск үсытн пусмалтаһуңкве ос ялантэгыт.

Ань кәсың пүльницат ёмас лёккарыт рүпитэгыт. Мән китыглахтын ләтың ке ёныщёв, тән ётаныл потыртаңкве вёрмёв. Мәхманув пусмалтаһуңкве тән вёвияныл.

Пәвлувт хөт хөтпат сыманылт операциял вәрвёсыт, ты юи-пәлт тән пусмысыт, элаль рүпитаңкве патсыт. Ань округ пүльницат сәвсыр ищхйпың утыт ёныщёгыт. Тамле утыл операция ке вәраве, элумхёлас моляхнувег пусми ос элаль пустагыл ёлы.

Александр Иванович вәтихал Россия янытыл яласы ос мөт мөт мәхум хумус пусмалтавет, акваг пүмщалахты. Тав ләвыс, мән округувт сәв ёмас пүльницат ёлэгыт, тот номтың лёккарыт рүпитэгыт, тыт ёлнэ мир эрнэ щирыл тән пусмалтэгыт.

Мөт лёккар мәхум

Наталья Никоновна Абрамова Хулюмсүнт пәвыл пүльницат 35 тәл мән нъяврамыт уральтым пусмалтыянэ. Лёккарыг тав Тюмень үст хаништахтас, ты юи-пәлт хүрум тәл Кондинский пәвилт рүпитас.

Төнт распределение-нэпак щирыл тув кётвес. Тувыл акв тәл Ягрим пә-

выл пүльницат рүпитас, 1980 тәлт Хулюмсүнт пәвылн ёхтыс. Наталья Никоновна такви рүпататэ урыл ос потыртас:

– Ам нъяврамыт пусмалтан лёккарыг 40 тәл рүпитэгум. Хулюмсүнт пәвылн хунь ёхтысум, төнт сәвсыр мәныл мәнлат хөтпат ос щёмьят рүпитаңкве тыг кётвёсыт.

1985 тәл сыв пәвлувт 40 нъяврамыт самын патсыт. Школан миннэ пораныл хунь ёхтыс, тән ләккварувтвёсыт, кәсың классыт 25 нъяврам хаништахтас. Төнт сәв нъяврамың щёмья ёлуңкве тыг вәнтласыт, сәв агиришит, пыгришит школан ялантасыт.

Кәсың тәл пәвлувт 20-25 нъяврам самын паты, ты тәл ат этпос сыв туп кит нъяврам. Ты тәл манрыг тох ёмтыс, ам тай щар ат вәглум.

Таи ёмас, ань мәнлат хөтпат сәв нъяврам ёныщуңкве кәсащёгыт. Хулюмсүнттыт хүрум-нила нъяврамыт янмалтан щёмья ань сәв ёлы. Акв нэ ты тәл 25 тәлэ төвлыс, тав хүрум

нъяврам ёныщи.

Пәвыл пүльницат Наталья Никоновна ёт 30 арыгкем тәл мән лёккарыг **Надежда Ивановна Алгадьева** рүпитас. Мәнщи нэ 2018 тәлт атымгы ёмтыс. Мән лёккарыг ань **Ольга Самсоновна Богданова (Самбиндалова)** рүпиты. **Татьяна Ивановна Алгадьева** сәвсыр анализыт выг.

Ты элы-пәлт пәвлың мәхум сәв тәл **Мария Тихоновна Двинянинова** пусмалтас. Ань мәнщи эква пенсият ёлы. Тав агитэ **Ольга Алексеевна Лаверина** ос сәв тәл мән лёккарыг ты пүльницат рүпитас. Тувыл Сосьвинский ЛПУ нампа организациян рүпитаңкве ми-нас. Тот лёккарыг ос акв мәнщи нэ **Нина Николаевна Гадебская** рүпиты.

Ам лёккар мәхум ялпың хөталыл янытлыя-нум, сәв ёмас, сывың ләтың тәнанылн ләвёгум. Тән эрнэ рүпата вәрёгыт, мәхум пусмалтэгыт.

Людмила ТЕТКИНА

Лёккар мәхум янытлыянүв!

Ләщал! Ляпан ул йиён!
Элыннув лёлён.
Китыт метра-охсан
Ос кит метра палытыт лёлён,
Тувыл ущ потрамён.

Консың-вәңың мосың агум,
Коронавирус карантин вәрыс.
Лёккар маска масэн,
Рещин тулёвлың пәсса масэн.

Нәнкинән үргалән
Ос рүт мәхман үргалым ёныщён,
Тох ты лёккарыт ләвёгыт!

М.Т. Двинянинова

Вөрүй совныл имтат вәри

Сургутский район Русскинская павылт «Мә-вит ос Элумхблас» музей-кол җлы. Кўщаиг тот Татьяна Александровна Ядрошникова рўпиты. Ты пёс йис пормас атнэ кол тав аятэ Александр Петрович Ядрошников 1988 тәлт вәрыстэ. Ань тот савсыр вөрүй ос товлың үй имтат акван-атым җлэгыт.



А.П. Ядрошников



Т.А. Ядрошникова

Александр Петрович 1940 тәлт Кировский область Нолинск үст сав ныврамың щемьят самын патыс. Пыг мәнә-тәгыл вөраим яласас. Ётыл Иркутск үст пушно-меховой техникум аслас. Та юи-пәлт мәнәлат пыг Сургутский район Русскинская павылн вөрүй үргалан хөтпаг рўпитаңкве кётвес.

Ты павыл округувт хөтал нэглин ёрт, Тром-Аган я ватат үнлы. Тот ханты мэхум вөраим, хул алыщлым ос сәлыт җныщим җлэгыт. Хус тәлт тот рўпитаме сыс, тав ханты мэхум пёс йис җлупсаныл ёмщакв ханищтастэ.

Хум 1970-ыт тәлытт вөрүй совныл имтат вәруңкве җвылтахтас. Вөрколэт щар җвыл мансынҗойка имта вәрыс. Та порат экватэ Людмила Алексеевна тавен җс нётыс, матыр хултын ләтың ләвыглас. Ләщал-ләщал хум мәщтырыг та ёмтыс.

1988 тәлт Александр Петрович музей вәруңкве номылматас. Тав колэ пөхат музей-кол үнттыс, кәтыл вәрум пормасанэ пуссын тув акван-атсанэ. Сосса мэхум тав вәрум

музейтыл сака пүмщалахтасыт, вәтихал ты музейн ёхталасыт.

Квәрум имтанэ акваг савмысыт. Тыимәгыс 1993 тәлт Сургутский район миркол пәлыл яныг музей-колыл үнттувес. Хум пормасанэ пуссын тув тотсанэ.

Тав 2002 тәлт мус тот кўщаиг рўпитас. Тувыл ты музей-кол кўщаиг яныг агитэ Татьяна Александровна Ядрошникова паттувес. Мәнә агитэ Наталья Александровна җс сав тәлт тот рўпиты.



Вөр пүрщ ос сәлы

Ты музейт җщнэ төва вөрүй имтат Русскинская павылт җлнэ сосса хөтпат хотты порат вәрсаныл ос тув тотсаныл. Ань тот сав пормас акван-атым җлы. Ты музейт рўпитан мэхум школат ос садикыт ханищтахтын ныврамыт ёт акван-потыртахтым рўпитэгыт.

Агит-пыгыт тот савсыр вөрүй хурит кәтыл вәруңкве ханищтавет. Ты вәрмәль ныврамытн сака мұсты, тән вәтихал мәщтырлаңкве тув ёхталэгыт.

Ты кол сака пүмщиг вәрвес. Тот вөрүй имтат коньпал, сосса мир пёс

йис пормасыт кәсалаңкве рөви. Кәсашан хөтпа мәгыс мә-вит урыл матыр кина суссылтаве.

Музей-кол кйвырт ханты ләтңыл мөйтыт мөйтавет ос пёс потырт потыртавет. Тув щалтум хөтпат савсыр вөрүй ос товлыңуй турсуит хунтамлаңкве вөрмөгыт. Мүй мэхумн тот ёмыгтаңкве сака мұсты.

Александр Павлович ты тәлт онтырсәт нупыл җвыл тәлэ төвлыс. Яныг-пәла хөтпа ань тыг мус тот рўпиты. Хус тәлт сыс сәтсәт сәвиткем вөрүй имта вәрыс. Ты мән вөрүйт җлнэ савсыр вөрүйт, товлыңуйт ос ят уйгалан хулыт. Ты вөрүйт намыл ат алыщласанэ, тән сакватахтым манос агмыңыг җлсыт, вөрт хөнтсанэ ос юв тотсанэ.

Экватэнтлы хөтпан нупыл кит тәлт аквьёт җлэг. Людмила Алексеевна ань тыг мус Русскинская павыл интернатт рўпиты. Тот җлнэ ханты ныврамыт үргалыянэ ос ёмас хөтпаг җлуңкве ханищтыянэ.

Ирина Самсонова
хансум потре мәнәщи
ләтңыг **Николай МЕРОВ**
толмәщластэ

Юильск павыл мәщтыр нэ

Ханты нэ Галина Сергеевна Молданова Ханты-Мансийск үст 6лы, «Лылың с6юм» ныврам ханищтан колт рупиты. Нэ мәщтырлаңкве сака хасы – ханты супыт ос мольщаңыт юнты, сакныл пальсакыт, турл6псыт ос м6т хорамыт харты.

Тав 6тэ Ханты-Мансийск үст «Т6рум Маа» музейт х6нтхатыгласум, потрамасум. Галина Сергеевна яныгмам поратэ номылмат6лыстэ, к6тыл в6рнэ пормасанэ урыл потыртас.

– Ам м6нтьагыл омам 6т юнсахатасум, хунь мощ яныгмасум, сакныл пальсакыт, олккасыт ос 6нтапыт хартсум. Нила-хуйплов т6лум порат п6квпалың ханты суп юнтсум. Омагум-6тягум с6лы 6рим яласасыг, ам Касум п6выл школат ханищтахтасум, интернатт 6лсум.

– Галина Сергеевна, наң х6т самын патсын?

– Юильск п6вылт 1970 талт самын патсум, м6лты порат атпан т6лум т6влыс. Омам Екатерина Васильевна, 6тям Сергей Михайлович Лозямов. Тэн Большой Вар п6вылт самын патсыг.

Казымский восстание 6лы-п6лт ащ6йкам Юильскыт 6лыс. Хунь ты нак 6мтыс, тав колт6глэ Кышик п6выл нупыл ой-малтахтас. 6тыл омагум-6тягум ащ6йкам яныгмам м6тэн в6нтлысыг, тот кол 6нттысыг, м6н, увщим ос каңканум, пуссын тот самын патсув.

6тям колт6гланыл яныг 6лыс – китхуйплов ныврам яныгмасыт. Ань



Нэкет щаквщим 6нлах6л6гыт

с6в р6т 6нщ6в, округув янытыл 6л6гыт, китгагув Ямал м6н 6лмыгтасыг. Омам увщи ос кит 6пщи 6нщас, Гоша ос Ал6ша, пуссын Юильскыт 6лсыт.

– Юн н6н щ6нь л6тңыл потыртасын?

– Остыгыл, хунь в6р-колувныл нулевой клас-сын тотв6сум, рущ л6тңыл потыртаңкве ат х6ссум. Интернатт ос школат л6тың х6луңкве мощ патсум. Тувыл ань каникулын юв тотвесув, ам рущ л6тың шар хот-6рувласлум.

Таквсы школан миннэ порав 6хтыс, ам туп х6рум букват номиянум. Ханищтан х6тпатн та пи-лат6лавем, рущ л6тың 6рувласлум, 6с аквта нулевой классын 6нтта-вем. Ам л6нщункве т6лт-хатасум. Учительницам Валентина Михайловна Вокуева л6выс:

«Г6лякве, акв 6тпос сыс рущ л6тңыл потыртаңкве ат те пат6гын, ам наңн ювле 6нттылум».

Т6нт Костя каңкум школат ханищтахтас, 6нум рущ л6тңыл поты-ртаңкве ханищтастэ, к6сың 6тип6ла ам 6тум ловинь-тас. Тувыл татем 6мащакв потыртаңкве патсум, рущ л6тың ос литература урок сака 6руптасагум, школан щ6гтым ялантасум.

Та порат 6тяв 6тимыг 6мтыс, 1979 талт. 6лм6т, номилум, в6рколт м6навн ханты м6йтыт м6йтыг-л6лыс. Хунь м6й х6тпат 6хт6гыт, яныгх6тпат акв ляпан 6нт6гыт, халанылт та м6йт6гыт, п6с йис пот-рыт потырт6гыт, 6мщ6гыт. Ань та колув в6рт иң 6нлы, с6мьяхув, та ма-ныр, ам тот яныгмасум.

Омам акваг юнсахатас, с6всыр супыт юнтыс. Хунь 6тяв хотталь щал-тыс, нас 6рнэ маснут ос пормас в6рыс – моль-щаңыт, л6гыл маснут, ул вос п6ляв6в. Увщим6нтыл акваг мольщаңыл 6лсу-м6н. Ам ань нывраманум м6гыс м6нти маснутанув 6с юнт6гум, в6рум супа-нум ос мольщаңанум сака п6мщалыяныл, щ6г-тым н6х-масапияныл. Пыгум колт6глыңыщ Тюмень 6ст 6лы.

Матъ6мас Ханты-Мансийск 6ст «Т6рум Маа» музейт р6питан сосса м6хманув с6всыр ханищтапыт в6рыгл6гыт, сакати тох акван-х6н-тыгпахт6л6в, халанувт потрам6в, ханищтахт6в. Сома м6й м6т 6лсум, номтум татем 6мас.



Г.С. Молданова

Светлана
РОМБАНДЕЕВА

Хөнтлам мән ялум хум хөтпат

Хальүст блнэ мәнщи нэ Любовь Константиновна Вынгилева «Лүймә сэрипос» газетан (13.05.2021г. №9) «Много наших мужчин по Сосьве, Оби под фронт железного войска увозят...» нэпак урыл потыр кетыглас. Яныг хөнтын ялум төва хөтпат наманыл хансыгласанув. Ань ос мот махум урыл потрыт кетыс, ты хум хөтпат бс пуссын Хальүс районныл блсыт. Элаль ань тән наманыл ловиньтэн.



**Семён
Иванович
Гиндыбин**

Мәнщи хум **Семён Иванович Гиндыбин** 1914 талт Ялыос павылт самын патыс. Яныг хөнтын вуйлуves, тот сакватавес, юв кетвес. Олнэ коланыл Люлюкары павылныл Ягримн тотсаныл, тот колхозт рупитас. Семён Иванович нёмса

хөтпа блыс, колтāгыл махманэ, рутанэ сака эруптасанэ.

Яныг хөнт порат лувит рупитаптын магыс хөнтлын мән кетыглавёсыт. Махум потырталсыт, Семён Иванович луве бс вуйлуves, наме Тарелка блыс. Хунь хөнт оигпас, ань лылыңтагыл хультум лувит ювле тотвёсыт, колхозт вос рупитэгыт.

Тән халаныл Семён Иванович луве Тарелка ювле ёхтум. Хум налув ёхтыс, потыртаңкве патыс, лувён турсуе хунтамлавес, отыре палт сұлтыл нуйхатас. Махум лавёгыт, луве самвитанэ нэгысыт, тав бс люньшин ёхтуves, татем та щāгтсыг.

Тарелка отыре ёт колхозт сав тал рупитасыг. Семён Иванович 1975 талт лүпта этпост атимыг ёмтыс, Ягримт ёлщёпитавес.



С.И. Гиндыбин колтāглэ ёт пслым блы




**Василий
Петрович
Вынгилев**

Василий Петрович Вынгилев 1925 талт Олттумп павылт самын патыс. Школат нила класс мус туп хаништахтас, атятэ ёт вбраяңкве ос хул алышлаңкве патыс. Хунь 18 талэ төвлыс, яныг хөнтын вуйлуves.

Өвлэт нас хаништахтас, руш щирыл военный подготовка тэлан паттуves. Тувыл уш хөнтлуңкве кетвес, 1943 талт 219 стрелковый гвардейский полкын хасвес. Аквта тал яныг таквс этпост вāңнэ сакватавес, госпитальн пусмалтахтуңкве кетыглаves. Пүльницаныл тартвес, ос 638-ит стрелковый полкын кетвес, ётылнуве ос 20-ыт стрелковый полкыт хөнтлыс.

Тот Василий Петрович отделение командирыг паттуves, гвардии старший сержант намыл майвес. Тувыл мәнщи хум китыт Прибалтийский фронтыт 90-ыт гвардейский стрелковый полкыт 1-ыл батальон 4-ыт ротат командирыг паттуves.



Василий Петрович хунь юв ёхтыс, потыртāлыс: «Йивн нбх-хāхсум, ань снайперыг блсум, үн-лэгу. Немец хумриш кāsаласлум, тав бс снайпер. Аном кāsаластэ, ам номсэгу, я-та, ты пāтамтавем, улпыл тыт та пуңкум пинылум. Ам писалюм тав нуплэ молях тактапаслум, та пāтамтасум. Сунсэгу, акваришум лэңын хольт ёл та тыламлас».

**Семён
Кириллович
Сайнахов**

Анья павыл мәнщи хум **Семён Кириллович Сайнахов** Ленинград үс ляпат ос Курский дуга мāt хөнтлыс. Агитэ Тамара Семёновна Мезенцева тох потыртāлыс: «Омам Анастасия Степановна Люлюкары павылныл блыс, атямн нас тұлмантавес.

Война элы-палт тән ат нйврам бщсыг, атям хөнтын ёхтуме юи-палт иң ат нйвраманэн самын патсыт. Яныг хөнт порат омам колхозт рупитас, нйвраманэ янмалтас. Павыл мир, нэ хөтпат ос

няврамыт, пуссын сав рупитасыт, хул алышласыт. Матыр катын-паттэгыт, тэлы лувыл Ханты-Мансийск усн тотыяныл. Ювле тэнутың тагыл эхтэгыт – сыртэп, колас, саккар тотэгыт. Атям кол-тагланылт тав шар яныг олыс, школат ат ханиш-тахтас, тара рупитаңкве патыс, опамн нэтыс. Ащиянэ тай пуссын ханиш-тахтасыт, Хальүс ялпың-колт школа олыс, тув тотыглавэсыт. Атям руш латың ат вэс, тох та хонтлыс, ётыл уш потыртаңкве патыс».

Аквматнакт Семён Кириллович китыглавэс, сáлыл яласаңкве хáсы, тав лáви, атхунь хáсы, áще сáлы үрнэ хөтпаг олыс. Тувыл хум сáлың суныл Ладожское түр хосыт Ленинград үсын тэнут тотыглас, тóнт май үс мир тэтáл марылта-вэсыт. Ювле ос няврамыт тотыс, тáнанылн оймал-тахтуңкве нэтыс.



**Василий
Николаевич
Вадичупов**

Мáньщи хум *Василий Николаевич Вадичупов* 1923 тáлт Сангитур пáвылт самын патыс. Война элы-пáлт Няхлаң пáвылт Ленин намба колхозт полеводыг рупитас. Хунь яныг хонтын



С.К. Сайнахов ос Экватэ Анастасия Степановна

минуңкве щёпитахтас, экватэн мáньщи супыл майвэс, лáвыс, супе акваг ёт вос оныщитэ, мори ул вос вущкасытэ, тох Нáй-Отыранэн үргалаве тах.

Василий Николаевич супе хөт-áти ёт тотыг-ластэ, тóванакт нөх-маса-пáлытэ. Ойка хөнтлын мáт сакватавэс, сáв щёс операциял вáрыглавэс, акв лáглэ хот-яктувэс. Воссыг ты áти, война юи-пáлт юв эхтахтас. Экватэ лáвыс, сóль, мáньщи супён та үргалавэс.

**Кирилл
Иванович
Пакин**

Кирилл Иванович Пакин Ленинград үс пöхат хөнтлыс. Олмёт потыртáлыс: «Окопат үнлэв, үрхатэв, немцыт хунь квáлапёгыт манос пáтлуптаңкве патэгыт. Сунсэгу́м, аквмат утаныл хáйты, окопа ёрн люлюм-тас, тамле карыс, ам тай талквариш. Та пáтамтас-лум, ойкариш ёл патыс. Мán руш лáтың ат вáсүв, командиранув матыр лáвёгыт, мán нэматыр ат торгамтэв. Мáнти халувт мáньщи лáтңыл потырта-сүв.

Мáхманув хоталь хáй-тэгыт, мán о́с тув та моля-

млэв, ёл-вущкасахтэгыт, мán о́с ёл-хүтувьёв. Нөх-люлюмтэгыт, ёмёгыт, мán о́с тán юи-пáланыл – на-сати тэңкве минэв. Хөтал сыс кит щёс тыттүвэсүв. Хунь хөнтлысүв, 100 грамм водкал майлувэсүв, аялэв, пуңкын ёхты, алпит рёгыңыг ёмтапи, шыкканув тáкыш пувим та хáйтэв.



**Михаил
Илларионович
Немдазин**

Ёрн хум *Михаил Илларионович Немдазин* 1878 тáлт Печора я вáтат самын патыс. Рүт мáхманэ ёт сáлы үрим Хальүс районын эхтах-тас, тóваныл Сортыня пáвылн олмыгтасыт, тав Лөпмуст хультыс. Мáньщи нэ тотыс, наме Агафья Егоровна Гындыбина. Тэн

11 няврам янмалтасыг. Михаил Илларионович нила лáтың вáс – руш, ёрн, мáньщи ос саран лáтңыт. Хөнтлуңкве ми́наме порат 64 тáлэ тóвлыс.

Хунь юв ёхтыс, потыртас, аквматнакт фашистриштитн яңкылмат мувыл-тавёсыт, тав мáхманэ нупыл лáви: «Ам рюкза́кт вáйиг о́ньщёгу́м, нөх-масыягу́м, мáньщи рубашка масэгу́м, немцыт палт минэгу́м. Тán тах сунсэгыт, ам хаштал маснутыл олэгу́м, áнум ат новияныл, тыхал мá хаништылум». Командиранылн ат тáртвэс, лáви, наң яныгхөтпа, мáньнув хум вос ялы.

Саранпáвылныл олум мáньщи хум кётвэс, пёс маснутыл мастувэс, вáиг масыс, немцыт палт та ми́нас. Ань хум немцыт палт ёхты, мáньщи лáтңыл потырты, щёранка вöви. Таитын консыгтавэс, штабын хáйттүвэс, тот та палиглаве, хотыл о́лы, маныр урыл китыглахты. Ань тот хáйтатáлыматэ сыс, тыгле-тувле сунсыглахтас, хөт маныр о́лы. Лáтңе толмашлан мáгыс, хөтпат вöвиньтáлвэсыт – руш, английский, итальянский ос французский лáтың вáнэ хөтпат. Торгамтаңкве ат та вёрмувэс, хоты лáтңыл потырты.

Тав нас кáтыл та хультыгы, тувыл мáньщи лáтңыл лáви, щёранка тавён эри. Немцытын щёранкал майвэс, та тáртвэс. Тувыл мáхманув оюңкве вёрмысыт, гитлер утыт мош пáтлуптасаныл. Ты тэла мáгыс Михаил Илларионович мáньщи хум ёт янытлавэсыг.

Любовь Вынгилева
кётум потре мáньщи лáтңыг
С. РОМБАНДЕЕВА
толмашластэ

Мән мāvн кетым мāvхум яныг сав тотсыт



Мәлал мән редакциявн пицма тотвес. Хәльүс район Светлый пāвил школат аквхуйплов класс āстлам āги Анастасия Муковнина яныг хөнт урыл потыр хансыс.

Тав та урыл сāv нәпак ловиньтас. Ань яныг хөнт урыл сāv кина пōслым ос нәпак хансым блы. Та тәрвитың порат переселенец ос сосса мāvхум лүимāt хумус блсыт, тав ты урыл потыр хансыс.

2019 тәлт «Неизвестные страницы спецпереселений: Ванзетур, Лапоры, Нерга» нампә нәпак тәратавес.

Ты нәпак Хәльүс краеведческий музейт блы. Тот сосса махум ос тыг ссылкан кетым хөтпат потраныл хансым бләгыт. Әги ты нәпак ловиньтаме порат, самвитанә нәглысыт, та яныт тәрвит блупса урыл тот хансым та блы.

Мāньлат āги яныг бпәтә ос яныг щәщәкватә ат номияге. Щәщәкватә лāvме щирыл, яныг бпәтә мāньщи хумыг блыс. Яныг щәщәкватә ос ссылкан тыг кетвес. Тән тыт вāйхатуңкве патсыг, ётыл акван-минасыг.

1930-ыт тāлытыт мән мāvт сāv няврамың щемьят блсыт. Кāсың колтāгылт ловманкем няврам яныгмас. Янге-мāне пуссын акв колт блсыт. Мāvхум сāvсыр уйхул бщсыт, тэпкәнт тәннут янмалтасыт, тāнки мāгсыланыл сāv рүпитасыт. Ётыл ты хөтпат «кулакыг» паттүвёсыт.

Өлнә палытыл маныр сәлсыт, уйхуланыл ос матыр-āti пормасаныл советский властин хотвиңкве патвёсыт. Эрттам тән сака щёлыңыг блсыт. Тән ат номсысыт, ты мāvхум тāнки ёранылт матыр-āti сәлсыт.

Пёс порат Нёрың мән ос Сибириң сāv хөтпа ссылкан кетвес.


Това хөтпат советский власть нупыл кāнтлыманыл мāгыс, мōтаныт ос матыр бвыл вāрнэныл мāгыс тыг кетыглавёсыт. Төнт сāv элумхблас наскāсыг саватавес. Ты мāvхум тыт йильпи пāvлыт

унттысыт, лёңхыт пинсыт ос мōт тәрвит рүпата вāрсыт.

Та тәрвит порат хум хөтпат матыр полщ лāтың хосыт нас тох ссылкан хотталь та тотвёсыт. Ётыл, хунь сāv тāl минас, ушта тāра-патыс, насати, тән Ханты-Мансийск үст сут тāl порслувёсыт.

Това ссылный хөтпат нāинтуйтн щемьяң тāгыл тālттувёсыт, лүимән тотвёсыт.

Лёңхыт мāvхум мōрсың порат тāнки тэланыл мāгыс кон-тāрталавёсыт, тән тэтāl тох та йисыт. Хотталь щалтум хөтпат вагон иснасыл нас конвуцкасавёсыт манос станцият хотты пōх хөтпатн ёл-щепитан мāгыс



майвёсыт. Та порат вāгталыг ёмтум сāv яныг-пāла хөтпат ос няврамыт лёңхыт тох та порсысыт.

Тыг тотым мāvхум бвыл порат ащирмаң колытт пāрт пāl тармыл хуясыт. Хуйнэхурыг пентсыл тө-





Хумыт лүляхөлэгыт



Нәквет рүпитәгыт

сам пум ёл пинтласыт. Ты паттат вәтихал сәвсыр тәрвитуң ағмытыл ёмталасыт. Төнт тәнүт-пормас ат төвылхатас, мәхум хумус вәрмысыт, тох та вәритасыт.

Яныгыт, мәнит пуссын аквтем хул алышласыт, ворясыт, пил вәтсыт, ләхыс атсыт ос пәкв паттысыт. Ты хосыт тәнки мәгсыланыл тәнүт вәрсыт ос элалы өлнә ёр хөнтсыт.

Акв нә нәпакт тох хансыс: «Тыт өлнә мир өвләт мән нупылув лүль самыл суссыт. Мән школат хаништахтуңкве ат тәртвесүв. Матыр ләтың лялыт ләвуңкве өс ат вәрмысув».

Поволжье мәныл пуссылкан тыг кәтым немцыт тән щар тәрвитуң өлупсаныл өлыс.

Война өвылтахтам порат мәхум тән нупыланыл сака кантлысыт, фашистыг ләввёсыт. Хөнтлум нак оигпам юи-пәлт тән иң сәв тәл лүкамтавёсыт. Ййквнә мән ос кина суснә колн

өс ат тәртыглавёсыт. Ётылнув ущ ләщал-ләщал рүпатал миңкв патвёсыт.

Яныгыт хөнт нак порат переселенцыт өвыл тәл хөнтлын мән ат вуйлувёсыт. Тән юн сәвсыр тәрвитуң рүпата вәрсыт. Хөнтлын мән тәнүт-пормас кәтсыт. Мән мәхманув нөх-патнә мәгыс сәв тәнүт фронтын кәтуңкве эрыс. Хул юв виңкве өс ат рөвыс. Тән нәвраманыл тыттын мәгыс түйтыглахтым хул юв тотыгласыт.

Та порат сасса мәхманув өлупсаныл өс аквтох нусаг өлыс. Алышлам воряныл ос хуланыл пуссын миңкве эрыс. Хөтпа матыр таквинәтән хульгупты ке, тәра писалил щама пәтамтаңкве вөрмувес. Төва хөтпат вөрт вөрүй совыт түйтсыт, ётыл та сөвытныл матыр маснут тәнки мәгсыланыл юнтыгласыт.

Акв элумхөласн карточка щирыл китсәт грамм нянъ майлувес. Этпос сыс ос моц лөмт коласыл

майлувёсыт, тувыл та. Сәккар өс щар әтим өлыс. Мәхум вөрт атым сөсныл щай пәйтсыт. Яныгыт хөтпат нярхул, нярнөвыл таим өлсыт.

Сытам мәт исмит пут пәйтыгласыт, тувыл ты тәнүтаныл суп ёлы-пәлн түйтым нәвраманыл тыттын мәгыс юв тотыгласаныл. Хумус вәрмысыт, та щирыл акван-нөтхатым та өлсыт. Та пылыщмаң пора мирн сәв тәрвит тотыс, сәв элумхөлас сәвалым порслувес.

Ётыл 1942 тәлт ссылкан кәтым мәхум ущта хөнтлын мән виңкве патвёсыт. Тән мөт мәхум ёт мав пилтәл вуянтасаныл. Война юи-пәлт тән иң хоса лүкамтавёсыт.

Рүпитан мән ат вуйлувёсыт ос мөт тәрвит өщсыт. Советский власть сәв вәрмаль тәнанылн тотыс кос, ос ты урыл тән щар нәматыр ат ләвыгласыт. Лүль номт ат өщсыт.

Округув нөх-вөрмалан мәгыс спецпересе-

ленцыт сәв рүпитасыт. Ты мәхум кол унттын мәгыс вөр яктысыт, лөңхыт вәруңкве нөтсыт, хул алышласыт, тәпкант сәвсыр тәнүт янмалтасыт ос мөт тәрвитуң рүпата вәрсыт.

Тыи ос мөт сәв өлум вәрмалит урыл ты нәпакт хансым өлы. Нән өс ты потрыт ловиньтаңкве вөрмиянын.

Анастасия ты музейт научный рүпата вәрнә хумн Алексей Вертковын, тот күщаиг өлнә хөтпан ос ты нәпак тәратан мәгыс нөтмил вәрум мәхумн яныгыт пүмащипа ләтың кәтыс.

Светлый пәвыл школат нәврамыт хаништан нә Елена Муковнина кәтум потыр мәныщи ләтыгы Николай Меров толмащластә

Пёс хурит нәпакныл ос ищхыпың мәт висанув.

Лүймә сәрипос

(Северная заря)
№12 (1246), 24.06.2021
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора, гл. редактор -
Кондина Г.Р.
Телефон (3467) 33-36-82

Заместитель гл. редактора –
Кондина Г.Р.
Телефон (3467) 33-36-82

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52

Е-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399

Тираж 1710 экз.
Заказ 2540

Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.

Экваг-ойкаг 50 тәл аквьёт өлэг



Экваг-ойкаг



Сосса мирн янытлавер

Урай үст өлнэ Экваг-ойкаг Валентина Андреевна ос Леонид Дмитриевич Лобановыг аквьёт 50 тәл өлэг. Ты кастыл тән лүпта этпос нилыт хөталэт Урай үс мирколт янытлаверсыг ос мүйлупсал майверсыг.

Валентина Андреевна – каркам, ёмас, мўтраң хөтпа. Тав Урай үст өлнэ сосса махум «Возрождение» нампа организациян яланты. Мөт маңыщи ос ханты махум ёт савсыр ялпың хөталыт, суссылтапыт, ханищтапыт вәрыглы. Тох пёс йис вәрмалит нөх-вөрмалты ос Элалы тотыянэ.

Тав Ханты-Мансийский район Реполово павылт самын патыс. Ома тэ ханты нэг өлыс, а тятэ – руш. А тятэ та павылт охсар янмалтан пёрмат күщаиг рүпитас. Валентина школа асламе юи-пәлт лёккарыг ханищтахтас. Ты юи-пәлт Тюли павылн рүпитаңкве ёхтыс.

Леонид Дмитриевич Хөнтаң район Лева павылт самын патыс. Ома тэ Аманья павылнлы өлыс, а тятэ репрессия тәлыт өлум порат ты маңыщи павылн Курган үсныл кетверс. Тав омаге-а тятге Ягодный павыл колхозт рүпитасыг. Леонид Дмитриевич шофёрыг

ханищтахтас, тувыл Ягодный павылн ювле ёхтыс.

1970 тәлт туи тав увшитэ пәлт Ханты-Мансийский район Выкатное павылн мүйлуңкве минас. Ты павылнлы Тюли мус миннэ лёңхе туп хурум вёрыста палытэ. Выкатное павылт тавён сака мустыс, өлуңкве тот хулыт, колхозн рүпитаңкве патхатас. Яныг машинал тот яласас.



Маңылат нэг-хумыг

Акв хөталт маңылат хум пүльницан үлюв тотуңкве лаввес. Тав машинал сав үлюв тув тотыс. Валентинатэ өвыл щёс тот та кәсаластэ.

Төнт Валентина Выкатное ос Тюли павлыгт лёккарыг рүпитаңкве патувес. Леонид тав акв павылнлы мөт павыл мус машинал вәтихал тотыг-ластэ. Тох маңылат нэг-хумыг акван-минасыг. 1971 тәлт яңк нәтнэ этпос мирколт заявление-нэпак хассыг, лүпта этпос китыт хөталт пури вәрсыг.

Павыл колхоз хунь лап-пантвес, Леонид Дмитриевич туи нәиңхәпыл яласаңкве патыс, тәлы найпос вәрнэ стан-

цият рүпитас. Няврамаге школан ялантан поратән ёхтыс, щёмья Урай үсн вәнтлас. Экваг-ойкаг сав тәл нәиңхәпыт аквьёт рүпитасыг. Каркамыг рүпитамён магсыл сав янытлан нэпакыл майверсыг.

Тән кит няврам янмалтасыг, ань хөт апыгрищ өныщег. Пыгён Андрей өс водителиг ханищтахтас, сав тәл машинал яласым рүпиты. Анна агитән няврам ханищтан нэг Тюмень үст ханищтахтас, сав тәл шоколат рүпиты.

Экваг-ойкаг ань пенсият өлэг. Валентина Андреевна апыгрищанэ сакныл хартуңкве, юнсхатуңкве ханищтыянэ. Леонид Дмитриевич тәнаныл хул алыщлаңкве, пил ватуңкве, ләхыс атуңкве ёт тотыглыянэ.

Лобановы Экваг-ойкаг сав тәл аквьёт өлнәтән магсыл «За любовь и верность» пөсыл майверсыг.

Маң тәнатән янытлы-ягүв, пус кәт, пус ләгыл Элалы вос өлэг. Няврамагён, апыгрищанән сав щәгт тәнатән вос тотэгыт.

Анна Изюмова
көтум потре
Людмила ТЕТКИНА
маңыщи ләтңыл хансытэ